

**MP pembangkang kecam agensi pembantu rumah asing biadap  
Malaysian Insider  
29 Oktober, 2012  
Oleh Md Izwan**

KUALA LUMPUR, 29 Okt — Ahli parlimen (MP) Pakatan Rakyat mengecam tindakan agensi pembantu rumah asing ekoran sikap tidak sensitif mereka dalam membuat pengiklanan yang boleh menyinggung negara jiran Indonesia.

MP PKR Chua Tian Chang pada hari ini di Parlimen mendedahkan satu pengiklanan bertajuk "Indonesia maids now on SALE" (gambar) yang dipamerkan oleh Smart Labour Services Sdn Bhd di sekitar Klang.

"Iklan ini sangat tidak sensitif dan tidak menghormati maruah seorang manusia," kata Chua.

"Ia bukan sahaja tidak menghormati malahan pada masa depan mungkin akan menjejaskan hubungan diplomatik antara Malaysia dengan Indonesia pada masa depan."

Naib presiden PKR itu juga berkata isu iklan pembantu rumah tersebut kini sudah berlegar di alam maya dan ramai rakan-rakannya di seberang yang sudah menghubunginya bagi menyatakan rasa tidak puas hati.

Turut hadir sama dalam sidang media tersebut MP Ampang, Zuraida Kamaruddin juga menggesa agensi kerajaan untuk meneliti isu yang dibangkitkan ini.

"Agensi kerajaan perlu meneliti kaedah pengiklanan ini dan memantau perkara seperti ini kerana jika ia tidak dielak dengan serta takut suatu hari nanti ia pasti menjadi isu lebih besar.

"Hubungan Malaysia dengan Indonesia pada suatu ketika pernah tegang kerana sikap kerajaan Malaysia yang lepas tangan dan cuai terutamanya dalam kes melibatkan penderaan oleh majikan," kata Zuraida.

Rentetan kontroversi melibatkan Malaysia-Indonesia telah menyebabkan kerajaan Republik tersebut melaksanakan pembekuan sementara penghantaran pembantu rumah ke Malaysia pada Jun 2009 berikutan beberapa kejadian penderaan terhadap pembantu rumah Indonesia oleh majikan Malaysia.

Tetapi ia kemudiaannya ia ditarik balik berkuatkuasa pada 1 Disember 2011 tahun lalu.

Selain itu, pada 2010 Kedutaan Besar Malaysia ke Indonesia di Jakarta telah dilempar najis manusia oleh penunjuk perasaan daripada kumpulan Benteng Demokrasi Rakyat (BENDERA) pada satu demonstrasi petang ini.

Tahun lalu juga, Kedutaan Besar Malaysia di Jakarta telah diserang oleh sekumpulan rakyat Indonesia ekoran rasa tidak puas hati mereka dalam isu sempadan Malaysia-Indonesia di Kalimantan Barat.

Hakcipta © 2012 The Malaysian Insider

Source:

<http://www.themalaysianinsider.com/bahasa/article/mp-pembangking-kecam-agensi-pembantu-rumah-asing-biadap/>